



Gratulaziun da Roland Conrad (dretg), il deputà da Zernez, per Jon Domenic Parolini ch'è vegnì nominà sco candidat per las elecziuns da la regenza dal 2014.

FOTO G. N. STGIER

Omadus èn pronts per il cumbat

Partida burgais-democratica dal Grischun

DA GION NUTEGN STGIER / ANR

■ **Cun il tandem Barbara Janom Steiner e Jon Domenic Parolini vul la Partida burgais-democratica (pbd) dal Grischun avoir er davent dal 2015 dus represchents en la regenza grischuna. La dunna da Cuira e l'um da Scuol èn vegnids nominads unanimamain per las elecziuns da la regenza da noss chantun dal 2014.** Ils 18 da matg 2014 elegia il suveran grischun las persunas ch'appartegnan per la perioda d'uffizi dal 2015 fin al 2018 a la regenza da noss chantun. Dapi mesmena saira èsi definitiv che la pbd da noss chantun va en il cumbat electoral cun dus candidats per defender ils dus sez. Cun grond applaus han ils radund 100 delegads nominà unanimamain *Barbara Janom Steiner*, ch'appartegna gia dapi il 2008 a la regenza grischuna. Bler applaus ha dentant er survegni *Jon Domenic Parolini*, dapi 13 onns president da vischnanca da Scuol e cun el vul la pbd defender il sez da *Hansjörg Trachsel*, da preschent president da la regenza. A la fin dal 2014 ha il schef da l'economia publica da terminar sia lavur pervia dal temp limità d'uffizi.

Betg in auter num

L'atmosfera tar la radunanza da delegads a Tavau en l'hotel «Waldhuus» era fitg buna, quai er cun esser delegadas e delegads persvas dad avoir cun Barbara Janom Steiner e da nov cun Jon Domenic Parolini duas persunas capablas per las tschernas da la regenza grischuna. Barbara Janom Steiner che ha cumenzà ses uffizi en l'executiva dal parlament grischun il 1. da matg 2008 haja fatg fitg buna lavur e meritia ina reelecziun, ha ditg *Andrea von Rechenberg* da la pbd Cuira che ha proponì da reelegger la cussegliera guvernativa en uffizi. *Roland Conrad*, il deputà da Zernez, ha lura preschentà en num da la pbd Engiadina Bassa/Val Müstair lur candidat *Jon Domenic Parolini*. Il deputà da Scuol ed actualmain president da la pbd dal Grischun è natiralmain in um cun ina gronda experientscha sin il champ politic ed ina persuna acceptada er sur ils cunfins da la pbd. A Tavau tar la radunanza da nominaziun è betg crudà in auter num e delegadas e delegads èn segirs che cun Barbara Janom Steiner e Jon Domenic Parolini saja pussaivel da defender omadus sez en la regenza grischuna.

Activ èn divers champs

En ses pled da nominaziun ha ditg Roland Conrad che Jon Domenic Parolini saja in um cun ina gronda experientscha politica sin champ communal, regional e chantunal. Ultra da quai saja l'um da 53 onns er in represchentant da las regiuns periferas, el conuschia bain il turissem, las relaziuns tar la forza idraulica, experientscha haja el dentant er cun la scolaziun e lura er quai che pertutga la promoziun da l'economia. El saja en tuttas modas e manieras in degn successur da Hansjörg Trachsel. Jon Domenic Parolini sco er Barbara Janom Steiner han ditg che da defender omadus sez en la regenza grischuna saja ina gronda sfida per l'entira pbd. Il tandem è dentant pront e va cun buna speranza en il cumbat electoral che saja dentant tut auter che simpel, han ditg la candidata ed il candidat. Jon Domenic Parolini è dentant er persvadi ch'ils 18 da matg 2014 saja per el betg in temp ideal per las tschernas da la regenza, saja il matg gist vacanzas en l'Engiadina. Quai vul dir che nus avain tuts dad ir anc cun dapli persvasiun e tgatsch en il cumbat electoral.